



Inuussutissarsiornermut, Suliffeqarnermut, Niuernermut Nunanullu allanut tunngasunut Naalakkersuisoqarfik

## **Tuniniaanissamik nittarsaassineq aamma nalunaaqutsersuineq pillugu Inatsisartut Inatsisissaattut siunnersuutip tusarniutigineqarneranut Kommuneqarfik Sermersuup akissutaa**

Kommuneqarfik Sermersuumi Isumaginninnermut, Suliffeqarnermut Inuussutissarsiornermullu Ingerlatsiviup Tuniniaanermi nittarsaassineq aamma nalunaaqutsersuineq pillugu Inatsisartut Inatsisissaattut siunnersuutip tusarniutigineqarnera tiguua suliarylugulu, qujavorlu ilassuteqarsinnaagami tusarniaanermut kingusinnerpaamik ulloq 15. januar 2015 akissuteqarfigineqartussamut.

Tusarniaanermut atortussani kikkut tusarniaavigineqarsimanersut allassimanngilaq naak tamanna Namminersorlutik Oqartussat tusarniaanernut malittarisassaani piumasaqaataagaluartoq, taamaattumik nalilerneqarsinnaanngilaq soqutigisaqaqatigiit pingaarnertit tusarniaanermi peqataatinneqarsimanersut.

### **Naliginnaasumik**

Tuniniaanissamik nittarsaassineq aamma nalunaaqutsersuineq pillugu Inatsisartut Inatsisissaattut siunnersuutit tusarniutigineqarsimasuuvoq akinissamut periarfissaqartitsilluni kingusinnerpaamik ulloq 10. januaari 2014, tassanilu kommune tusarniaanermut akissummik ilanngussaqaarpoq.

Siunnersuummi oqaatsit pillugit piumasaqaatigineqartut kommunip Kalaallit Nunaannilu Sulisitsisut Peqatigiiffiata annertuumik ernumanartut uparuarpaat taamaattumik paasiuminaalluinnarpoq tusarniaanermut akissutaasimasut inatsisip oqaasertaasa allanngortinneqarnerannik kinguneqarsimanngimmata. Siunissami oqaatsinik atuinissaq pillugu oqallinneq politikkertalerujussuuvoq taamaattumik oqaatsit pillugit piumasaqaatinik Inatsisartut Inatsisissaannut pineqartumut ilanngussinnginnermi oqaatsinut politikkissaq utaqeqqaarneqartariaqaraluarpoq. Tamatuma aamma Tuniniaanissamik nittarsaassineq aamma nalunaaqutsersuineq pillugu Inatsisartut matussusersimasinnaagaluarpaat taamaasillunilu § 7 imm. 2 aamma § 8 inatsimmi oqaasertani piiginnarneqarsimasinnaagaluarput.

Najukkami atuisartut ataatsimiititaliaasa atorunnaarsinnissaannut kommunip ernummateqarnera oqaaseqaatini sammineqarsimanngilaq aamma inatsimmi oqaasertaliunneqartut allanngortinneqarnerannik kinguneqarsimanngilaq tamannalu ernumanartoqarpoq.

### **Kommunip oqaaseqaatai**

Inatsisissatut siunnersuummut oqaaseqaatit pillugit, siunnersuutit tusarniaanermut atatillugu akissummi erseqqissarneqaraluarpoq Kommuneqarfik Sermersuup

nalignnaasumik siunnersuut taperseraa. Erseqqissarneqassaaq kommunip tuniniaanissamik nittarsaassisarneq pillugu inatsisip "out datede"-sup nutarterneqarnissaa illersorsimammagu, sualummik teknologimi ineriartorneq tunngavigalugu, taamaakkaluartorli tassunga tunngatillugu aamma ernummateqarsimavoq. Sualummik § 8-mi oqaatsinut piumasaqaatit kalaallit suliffeqarfiutaasa unammillersinnaanerannut isertitaqarsinnaanerannullu sunniutissai eqqarsaatigalugit inuussutissarsiortuni/inuiaqatigiinni pissutsinut massakkorpiaq atuuttunut naleqqiullugu.

Kommunip maluginiarpai Kapitel 2 § 7 pillugu inatsisissamut siunnersuummut oqaaseqaatinut ilanngunneqarsimasut, tassanilu uku oqaaseqatigiit taperserlugit *Neqerooruteqarnermi, isumaqatigiissuteqarnermi imaluunniit tunniussinerup nalaani pisut malillugit, pisuussutit nalillit imaluunniit sullississutip suussusaa malillugu tamanna pisuussutip imaluunniit sullississutip suussusaanik imaluunniit piginnaasaanik naliliinissamut*

Kommunip maluginiarpai Kapitel 2 § 7 imm. 2 eqqarsaatigalugu inatsisissatut siunnersuummut oqaaseqaatit erseqqissarneqarsimaneri, tassani erseqqissarneqarpoq, ilitsersuutit pisiniartup paasisinnaasai pineqarmata, imaanngitsoq tunisassiortup allassimasaanik manualinik ilitsersuutinillu nutserinissaminut inuussutissarsiortoq piumasaqarfigineqartassasoq. Soorlu Kalaallit Nunaanni Sulisitsisut Peqatigiiffiannit (GA-mit) tikkuarneqartoq, taamatut piumasaqartoqartalissagaluarpat taava inuussutissarsiortut minnerit nutserinermut annertuumik aningaasartuuteqartalersussaassapput. § 7 imm. 2 pillugu aamma assortuuttoqalissagaluarpat uppersaanissaq eqqarsaatigalugu maannakkut nalignnaannaq ammasumik isummersorneqarsinnaavoq unamminartoqarsinnaallunilu (takuuk. aamma oqaaseqaatit oqaasiinnakkut ilitsersuutinik tunngaveqarsinnaapput).

Pingaartillugu soorunami tapersersorneqarpoq kalaallit oqaasiisa nukittorsarneqarnissaat kisiannili peqataanik naapertuutinnngilaq kalaallit inuussutissarsiortut aningaasartuutitigut artukkorsorneqarnerussappata naggataatigut tunisaqanngitsoornerannik kinguneqarsinnaasumik. Kommunip naapertuuttutut isigaa tuniniaanissamik nittarsaassisarnermi ilaatigut atuisartut illersorniarneqarpata, naammattumik, taamaakkaluartorli aamma pingaartillugu kissaataasariaqarpoq inuussutissarsiortut pillugit naapertuuttunik inatsisitigut sinaakkusersuisoqarnissaa, taakku kalaallit aningaasarsiorneranni iluanaaruteqartarnissaat pillugu.

Taamaattumik kommunip eqqarsarnartoqartippaa matumani oqaatsinut politikkeqarmat sakkortuumik inuussutissarsiortut inuiaqatigiillu iluanaarutissaat tunulliullugit, sualummik piffissami matumani kalaallit aningaasarsiornerata annertuumik ajornartorsiorfiani.

Inuussutissarsiortut ullumikkut tuniniaanissamik nittarsaassinermi kalaallit oqaasiinik atuisut pillugit siunnersuummut oqaaseqaatini nalilerneqarpoq, *oqaatsinut piumasaqaat pissusiviusuni kaaviiaartitaqarnerulersitsisinnaassasoq, tassami atuisartut pisisartullu arlaqartut kalaallisuinnaq oqaaseqartut taamaalillutillu inuussutissarsiornermik ingerlataqartut sunik niueruteqarnerisut, tamatuminnga paasissutissiivigineqassamata taamaalillutillu nioqqutissanik sullississutinillu taakkuninnga ujartuinissamut periarfissaqalerlutik.*

Oqaatsinut piumasaqaatip nioqquteqarnerulernermik kinguneqarsinnaanera kommunip isumaa naapertorlugu eqqarsarnartoqarpoq. Naliliinermi aamma tunngavigineqarpassippoq Naalackersuisut inuussutissarsiortunut ataasiakkaanut naleqqiullutik ilisimanerugaat suut nioqquteqarnerunermik kinguneqartitsisarnersut kiisalu aamma eqqarsartoqartoq taakku ullumikkut tuniniaanissamik nittarsaassineq ajortut isertitaqarnerunissartik anguniarlugu.

Kommunip eqqoriarpaa sulinermi taaguutit eqqarsaatigalugit immikkut akuersissuteqarnissamut tunngavissaqartassasoq pisortatigoortumik taaguutit kalaallisut pigineqarsimatinnagit takuuk § 8 imm. 3-4. Aamma kommune isumaqarpoq naapertuutissasoq soorlu takornarialerisut nuna allamiunut tuniniaaniarlutik nittarsaassippata § 8 imm. 4 naapertorlugu immikkut akuerineqartarnissaat.

Kommunip tapersorsorpaa kingusinnerusukkut isummernissaq aamma ad hocimik naliliinissaq, takuuk § 8 imm. 5, tamanna aqutigalugu inatsimmi tunngavik naleqqussarneqarsinnaammat, ersissagaluarpat oqaatsinut piumasaqaat inuussutissarsiortut ilaannut ajornartorsiortitsisoq imaluunniit piumasaqaat ilimaginngisanik siunertarineqanngitsunillu ajortunik kinguneqartoq.

Tusarniaanermut akissut allaffimmi suliarineqarpoq taamaattumik pineqartoq suli politikkikkut suliarineqarsinnaasimanngimmat, kingorna politikerinit suliarineqareerpat allannortoqarsinnaanera eqqaamaqquneqarpoq.

*Inuulluaqqasillunga // Med venlig hilsen //Best Regards*

**Grethe Nielsen**

Isumaginninnermut, Suliffeqarnermut Inuussutissarsiornermullu Ingerlatsivimmi Pisortaq